

In de wolke

In de wolke, in de wolke, in de wolke

in de wolke waas ik gisteroavend
geej en ik in de tuin
en toen hebbe we getonteld
hiel veul hout, `t alde puin
lang op `t terras gezeate
same in `t veur gestaard
en dit moment hiel good bewaard

same kieke nar de kurf
nar de vlam die hiel snel grujt
`t brandde hard als druuge turf
`t het nog oore noageglujd
lange stukke doorgebroake
de oranje gloed di scheen
`t waas tot op de stroat te zeen

vonke die nar boave vlooge
lichtjes in de donkere nacht
en hiel lang gen woord gezagd

we ware bijna wir vergeate
dat dit sort dage nog bestoan
allien gekeke en gezeate, gezeate,
alles in roek op loate gegoan

in de wolke, in de wolke, in de wolke

in de wolke waas ik gisteroavend
wir nar enne lange tied
langzaam in de schemering
rakte weej os zelf kwiet
`n sigaar bij opgestoake
en gen vroage mier gesteld
en elke zeagening geteld

en gedocht an fijne dinge
`t kalde drinke in de hand
en hoe snel alles verbrandt

we ware bijna wir vergeate

dat dit sort dage nog bestoan
allien gekeke en gezeate, gezeate
alles in roek op loate gegoan

in de wolke, in de wolke, in de wolke

[Tekst en muziek: Jack Poels]

[cd 'Geal', HKM 2012]